

DIDZA' ZI'AL BSÖLË'Ë PABLO QUEËBI' BI'I TIMOTEO

Pablo rugapë' Dios bi'i Timoteo

1 Neda', Pablo, naca' gbaz nasölë'ë Jesucristo. Cni naca' le gna bë'ë cni Dios, Nu ruslá rë'u, lenca' le gna bë'ë cni Xanru' Jesucristo, Nu na' runru' löz. ²Rugapa' Dios li', bócha'adau' Timoteo, nacu' ca xzi'ncza' le réjlë'ru' Dios. Rnaba' lahuë' Xuzru' Dios len lahuë' Xanru' Jesucristo uzá' ladxë'ë quiu', len huechi' ladxë'ë li', len gunë' ga soa dxi icj ládxi'da'u.

**Pablo rusë'ë ládxi'bi' Timoteo
ca nac zxba cunác gdu**

³Ráta'yua' lau' na'a gunu' ca na' gúta'yua' lau' cati' ni' gyija' luyú Macedonia, quië uga'nu' lu yödz Éfeso len gna bé'inu' la'quë' bönni' ni' cui lusëdnë' zxba yubl ⁴len cui lunë' zxon yugu' didza' rdaz, len lagac ziantër cö' xuz xtau'gac bunách, yugu' le tun ga tui' ládxi'gac bunách le nacgac daduz. Yugu' le cni cutu tun tsutsu bunách queë' Dios ca nac le ta'yejlë' Lë'.

⁵Le rë'ni gun lë ni répa' li', nac quië la'dxí'i lza'gac bunách, nac gdu ládxi'dau'gac, len gac dxi'a

le ta'zá' ládxi'gac, len gac gdu le ta'yejlë' Dios. ⁶Ca nacgac lë ni, cutu gulurujë' dxi'a la'quë' bönni', san gulaguel-lë'ë nöz yubl, len tunë' ba la'n yugu' le cunác. ⁷Të'nnë' lusëdnë' bunách ca nac le rna bë' zxba queë' Dios, zal-la' cutu ta'yéjni'në' lë na' ta'né', len cutu ta'yéjni'në' le tun tsutsu xtídza'quë'.

⁸Rë'u nóziru' nac dxi'a zxba gna bë'ë Dios, chqui' nu rugún lei dxin ca ral-la' gun. ⁹Lë ni nóziru': Dios gdixjë' zxba queë', clëg quië gna be'i bunách tsahui', san quië gna be'i bunách cni:

nup ta'dá'baga' le rna bë' zxba na',
nup cutún ca rna bë' zxba na',
nup tu'cá'n ca'z Dios,
nup tun le nac xöhui',
nup cutún Dios zxon,
nup tu'cá'n ca'z le naqui queë'

Dios,
nup tu'dödi xuz xna'gac,
nup tu'dödi bunách,
¹⁰nup tun le cunác,
bönni' nacuá'lenë' la' racz lza'

bönni'quë',
nup ta'bán bi'idau',
nup ta'zí' yë',
nup tun tsutsu xtídza'gac, ta'ná
le cunác,

nup ta'dá'baga' zxba tsahui'.

¹¹Nóziru' nac cni le bdxin queëru' didza' dxi'a buzá' ladxè'è queëru' Dios Nu nac la'y, le budödè' lu na'a guna' lban qui.

**Pablo rè' Cristo: "Xclenu'",
le buechi' ladxè'è lè'**

¹²Xclenu', rëpa'-nè' Xanru' Jesucristo, Nu rutíp ladxá'a, le buzzöni ladxè'è neda', len buzóè' neda' guna' xchinè'. ¹³Cni benè' zal-la' zi'al neda' gnè' zi'a queè', len gdxia ladxá'a bunách queè', len zian le bi'a dö' quequè', san Cristo buechi' ladxè'è neda', le bena' cni lu yöl-la' curejni'i quia' cati' ni' cutu réjlè'da' Lè'. ¹⁴Na'a, zxöntèr nac le buzá' ladxè'è quia' Xanru', lè na' run ga réjlè'ru' Lè' len run ca' ga nadxi'iru'-nè' Jesucristo.

¹⁵Didza' gdutè li lè ni len le nac lsaca' la'zì' lu na'gac yúgu'tè bunách, le rna: "Lëczè' Jesucristo bidè' yödzyú ni quiè buslé' bunách dul-la'", ati' buslé' neda' zal-la' nacra' bönni' dul-la' ca yúgu'tè bunách. ¹⁶Qui lè ni na' buechi' ladxè'è neda', bulu'è lahui Jesucristo ni'a quia' neda' bönni' dul-la', ca nac yöl-la' zxön ladxi' gdu queè', quiè gaca' tu le ruluí' laugac nup ral-la' la'yejlè' Lè', gata' quequè' yöl-la' na'bán gdu. ¹⁷Na'a rnia': Yöl-la' ba Dios, Nu rna bè'tecz, Nu gatga udx qui, len Nu curlé'iru', la'z dui Dios Nu nözicz yúgu'tè. Queè' Lè' gactecz yöl-la' run ba la'n len yöl-la' ba, na'a dza len yúgu'tè dza zi'a za'c. Ca' gac.

¹⁸Zxi'na'dau' Timoteo, rudöda' lu na'u zxba ni quiè gunu' xchinè' Dios ca bönni' gdu ladxè'è rijè' gdil-l, len

quiè uzi'u xbey yugu' le gulaguixjö' quiu' zi'al nup ni' glui' didza' uláz queè' Dios. ¹⁹Len yöl-la' rejlé' quiu' Cristo ral-la' gunu' cni, nac gdu dxi'a icj ládxi'da'u, le chgulachixi gulanigui la'gac bunách, nup guluzóa tsla'l le réjlè'ru' Cristo. ²⁰Cni glunè' Himeneo len Alejandro, nup na' busana' lu na' Satanás tu' xöhui' quiè la'zèdè' ca ral-la' lunè', cui la'nè' zi'è qui le naqui queè' Dios.

Le rusèdi rè'u ulidzru'-nè' Dios

2 Qui lè ni na' le nac blau ruchizia' icj naggac bunách nac ca ral-la' ulidzru'-nè' Dios len ca ral-la' gáta'yuru' lahuè', len ca ral-la' gnabru' lahuè' bi rquíniru', len ca ral-la' guièru'-nè': Xclenu'. Yugu' lè ni ral-la' gunru' uláz quegac yúgu'tè bunách. ²Lëzca' cni ral-la' gunru' uláz quegac nup ta'ná bè', len quegac yúgu'tè nup nacgac blau. Cni ral-la' gunru' quiè gac dxi'a queëru' len gac queëru' yöl-la' rböz dxí'adau'. Ral-la' gunru' cni lu yöl-la' rejlé' queëru' Dios len lu yöl-la' ba'a ladxi' queëru'. ³Lè ni nac dxi'a len le rdzag ladxè'è Dios, Nu ruslá rè'u. ⁴Dioscz rè'nnè' lulá yúgu'tè bunách len rè'nnè' lunbè' le nac gdutè li. ⁵Tuzè' naquè' Dios, len tuzè' bönni' ruünè' dzag Dios len bunách. Nu ni nac Jesucristo, Nu böac bunách. ⁶Lëczè' budöd cuinè' lu yöl-la' gut, le gdixxnè' qui dul-la' nabága'gac yúgu'tè bunách. Dios benè' lna' lau queè' cati' bdxin dza queè' gutiè'. ⁷Ca nac lè ni, Dios buzóè' neda' quiè guna' lban qui, len gaca' gbaz nasölè'è Cristo, quiè usédgacda' bunách gza'a ca nac

le réjlè'ru' Cristo len ca nac le nac gdutè li. Blítèda' len cutu ca' rzi' yè'a.

⁸Na'a, rè'nda' lulidzè' Dios bönni', láta'yuè' lahuè' gáti'téz, nacquè' gdu dxi'a, len cula'leynè' lza'què', len cula'díl-l dídza'què'. ⁹Lèzca' cni, rè'nda' lácunu ngul le nac ba'a. Le nac lach le ral-la' lului'nu lahui nac yöl-la' nöxj ladxi' len le nac gdu ladxi', len clèg le tu'pa'znu icj laucnu len oro, len yugu' bga, len lari' záqui'tsqui. ¹⁰Yugu' le dxi'a tunnu luluí' lahui le nacnu ca na' run le tácunu le nac ba'a. Cni ral-la' lunnu ngul núnbè'cnu Dios. ¹¹Ral-la' la'cua'nu dxiz ngul cati' nu rusèdi lecnu len la'cua'nu nöxj. ¹²Cutu runna' latj ngul lusédinu len cula'ná bé'ínu bönni'. Ral-la' la'cua'nu dxiz ga nudubgac bunách queè' Cristo. ¹³Cni ral-la' gac, le buzòè' Dios zi'al Adán, ati' gdöd na' buzòè'-nu Eva. ¹⁴Adán na', cutu gzxi' ye'i lè' tu' xöhui', san ngul queè', gzxi' ye'i lènu. Cni guc, gditsjnu zxba queè' Dios, ¹⁵san ulanu ngul ruzoanu-bi' bi'idau' chqui' gúntecznu ca rajlóz le réjlè'ru' Dios len yöl-la' nadxi'i, len chqui' gacnu gdu dxi'a len gdu ladxi'.

Ca ral-la' lacquè' bönni' tun chi'è bunách queè' Cristo

3 Didza' gdu lè ni rna: “Chqui' rui' ladxè'è bönni' gaquè' nu gun chi'i bunách queè' Cristo, dxin dxi'a rzè ladxè'è.” ²Run bayúdx nu run chi'i bunách queè' Cristo gac bönni' nutu nu gac bi gnè queè', len soa tuznu ngul queè'. Ral-la' gaquè' ban ladxi', len gdu ladxi', len nöxj ladxi'. Ral-la' gu'è ga

la'cu'è bóchi'ru' ta'dxinè' lidxè', len gaquè' ca' bönni' nazáqui'tsquinè' usèdnè' bunách. ³Cutu gaquè' bönni' ri'ljè', len clèg bönni' snia', len clèg bönni' rzè ladxì'zè' si'è dumí, san ral-la' gaquè' bönni' dxi'i ladxi', len xön ladxi'. Cutu gaquè' bönni' ruhuí'di'nè'. ⁴Ral-la' gaquè' ca' bönni' rna bé'inè' dxi'a bunách nacua' lidxè', nacua'bi' zxi'nè' tunbi' ca rna xtidzè'è lu yöl-la' run ba la'n xuzcbi'. ⁵¿Naru' huactsa gun chi'è bunách queè' Dios tu bönni' chqui' cutu rac gna bé'inè' dxi'a bunách nacua' lidxè'? ⁶Cutu ral-la' gaquè' bönni' zi'a gzu lahuè' t'èè Cristo, cui töd bè'i gun ba xön cuinè' len cugác queè' ca na' guc qui tu' xöhui', ben ba xön cuini, ati' Dios bchuguè' qui. ⁷Lèzca' ral-la' gaquè' bönni' ta'ná dxi'a queè' nup cunababgac bunách queè' Cristo, cui soa nu uzóa lè' tsla'l, cui gdzunè' lu yal-lj qui tu' xöhui'.

Ca ral-la' lacquè' bönni' nadód lu na'què' láclenè' bunách queè' Cristo

⁸Lèzca' cni ral-la' lacquè' bönni' nadód lu na'què' láclenè' bunách queè' Cristo. Ral-la' lacquè' bönni' gdu ladxi', tunè' ca ta'nè'. Cutu lacquè' bönni' ti'ljè', len culacquè' bönni' ta'zè ladxì'zè' la'zi'è dumí. ⁹Ral-la' lacquè' bönni' tun chi'è ca nac gdutè le réjlè'ru' Cristo, nac gdu dxi'a icj ladxì'dau'què'. ¹⁰Yugu' bönni' ni ral-la' si' bè'li' lequè' zi'al, ati' ni'r gata' lu na'què' lacquè' bönni' nadód lu na'què' láclenè' bunách queè' Cristo, chqui' cuzóa nu gac bi gnè quequè'. ¹¹Lèzca' cni, ngul qui queè'què' ral-la' la'cua'nu gdu ladxì'cnu, len culacnu uné qui

lžè'i. Ral-la' lacnu zxön ladxi', len lacnu gdu ca nac yúgu'tè le tunnu. ¹²Yugu' bönni' nadód lu na'què' láclenè' bunách queè' Cristo ral-la' lacquè' bönni' zoa tuznu ngul qui queèquè'. Lèzca' ral-la' la'ná bé'inè' dxi'a zxi'nquè' len bunách ulídx qui queèquè'. ¹³Run bayúdx gac cni, le ta'dél-li'nè' latj ga lun ba la'n xtídza'què' bunách, chqui' tunè' dxi'a dxin tunè' táclenè' bunách queè' Cristo, ati' lacrè' rugu ladxi' lu'è didza' ca nac le réjlè'ru' Jesucristo.

Le bgachi' qui le rej ládxi'ru'-nè' Dios

¹⁴Yugu' didza' ni ruzuja' quiu' lu guich, zal-la' runa' löz duyutea' li'. ¹⁵Chqui' huadzeyda', ruzuja' quiu' didza' ni quiè gnöznu' nac ral-la' gunu' laugac bunách nacua' lidxè' Dios, nup nacgac bunách queè' Dios ban, len nacquè' tsutsu, ta'guíxjö'è le nac gdutè li. Nacquè' ca yugu' yzxön len le nunída'gac zö'ö, nacgac tsutsu, len ta'zón yu'u. ¹⁶Le nactè, zxöntèr nac le bgachi' qui le rej ládxi'ru'-nè' Dios, ca na' nayúj lu guich, rna:

Dios buluí' lahuè', guquè' bunách.
Guc bè' naquè' tsahui' le
gzóalenè' Lè' Dios Bò' La'y.
Gulalé'inè' Lè' gbaz la'y queè'
Dios.
Guc lban queè' laugac bunách
gza'a.
Gulayejlè' Lè' bunách yödzyú.
Dios buchisè' Lè' xtsa' ga
náctèrè' blau.

**Nup luhuóa ládxi'gac ca
nac le réjlè'ru' Cristo**

4 Yalj lulu rguíxjö'è Dios Bò'
La'y, rnè': "Dza tsajséytègac,

la'dá'baga' Cristo la'gac bunách." Luhuóa ládxi'què' ca nac le réjlè'ru' Cristo. Luzé nagquè' xtídza'gac bunách nacua'len lequè' bō' rzi' yè', ati' luzé nagquè' yugu' zxba quegac bō' xōhui'. ²Luzé nagquè' xtídza'gac bunách tu'luí'z tsahui' cuingac len tui' didza' le cunác, chnazíd ládxi'dau'gac, cui uxós lequè'. ³Cni nac, tu'zaguè'è xnözgac nup tè'ni lutság na'gac, len ta'ná bé'inè' bunách cui lagu le nagu'è Dios quiè uzi'ru' xbey, lè na' huac lagu nup ta'yejlè' Dios, nup na' chnúnbè'gac le nac gdutè li, len tè' Dios: "Xclenu'", cati' tahuè' lei. ⁴Dxi'a nac yúgu'tè le benè' Dios, len cutu bi ral-la' uzoaru' tsla'l chqui' ráguru' lei, rèru'-nè' Dios: Xclenu'. ⁵Rusèdi rè'u xtídzè'è Dios, Lè' unè' dxi'a yúgu'tè le ral-la' gáguru' chqui' ulidzru'-nè' Dios gnábiru'-nè' gun la'yè' lè na' gáguru'.

**Ca rurujè' dxi'a huen dxin
queè' Jesucristo**

⁶Chqui' usèdcnu' böchi' lza'ru' yugu' didza' ni, uruju' dxi'a, gacu' huen dxin queè' Jesucristo, len gac bè' nazèdu' dxi'a ca nac didza' qui le réjlè'ru' Cristo len ca nac zxba dxi'a run chi'u. ⁷Gru'n yugu' didza' rdaz qui yödzyú ca nac didza' tui'nu ndau' gul. Bentecz le run ga gacu' tsutsu quiè gunu' ca rè'nnè' Dios. ⁸Lati'z uzi'u xbey gunu' le gun ga gacr nal ni'a na'u, san gdu uzi'u xbey gunu' ca rè'nnè' Dios. Cati' runru' cni, lè ni run ga runru' löz soaru' gbanru' yödzyú ni, lenca' soaru' gbanru' dza zi'a za'c, tōd uza'ru' yödzyú ni. ⁹Didza' gdutè li lè ni, len le nac lsaca' la'zi' lu

na'gac yúgu'tè bunách. ¹⁰Qui læ ni na', szxöni rusaca' zi' cuinru' runru' dxin, le runru' lõz Dios ban. Cristo gutiè' quiè uslé' yúgu'tè bunách. Ruslé' nup na' ta'yejlè' Lè'.

¹¹Gna be'i len bsèdi bunách lun yugu' læ ni. ¹²Nutu nu ral-la' uzóa li' tsla'l le nacu' bi'i ra'bán, san ral-la' gunu' le uluí'i nup ta'yejlè' Dios ral-la' lun ca runu' li'. Cni uluí'inu' lequè':

len didza' ru'u,
len le runu',
ca nadxi'inu' lza'u,
ca ru'u latj zóalenè' li' Dios Bö'
La'y,
ca runu' ca rnau',
ca nacu' gdu dxi'a.

¹³Tsal za'a gdxina' quiu', bè'tecz ladxu'u ulabu' guich la'y laugac bunách nacuá' ga ni' zu'. Bchiz icj nagquè' læ ni, len bsèdi lequè'.

¹⁴Cutu udödu' ca'z le buzá' ladxè'è quiu' Dios, læ na' bennè' quiu' ca na' gulaná quiu' nup ni' glui' didza' uláz queè' Dios, cati' ni' gulaxóa na'què' li' len gululidzè' Dios bönni' gul tun chi'è bunách queè' Cristo.

¹⁵Bentecz yugu' læ ni. Bè'tecz ladxu'u gunu' cni, quiè la'le'i yúgu'tè bunách ca na' zeaj rdél-li'nu' le naqui queè' Cristo. ¹⁶Ben chi'i cuinu' len ben chi'i zxba rusédiru'. Bentecz yugu' læ ni, ati' chqui' runu' cni, uláu' li' len lulá ca' nup la'yöni li'.

**Ca ral-la' gunbi' Timoteo
quegac bunách queè' Cristo**

5 Cutu uzeycnu'-nè' ba nadx bönni' gul, san bchiz icj nagquè' didza', tscá nacquè' xuzczu'. Bchiz icj nagcbi' bi'i bönni' ra'bán

didza', tscá naccbi' bi'i bóchi'czu'. ²Bchiz icj nagenu ndau' gul didza', tscá naccnu xna'czu'. Bchiz icj nagcbi' bi'i ngul ra'bán didza', tscá naccbi' bi'i zanczu', ca na' rajlóz le nac gdu dxi'a.

³Ben ba la'n yugu' ngul uzéb, naccnu gdu uzéb. ⁴Chqui' zoanu ngul uzéb nacula'bi' bi'i queènu o zxi'n xsoanu, ral-la' la'zèdbi' lunbi' ca rè'nnè' Dios, láclenbi' zi'al bunách nacuá' lidxcbi', len lubi'ibi' quequè' xuz xna'cbi'. Læ ni nac dxi'a len le rdzag ladxè'è Dios.

⁵Na'a, ngul na' nacnu gdu uzéb, len naga'nnu tuznu, runnu lõz Dios ati' rël len tè dza rnábtecznu lahuè' Dios len rulidznu Lè' ni'a quegac bunách queè', ⁶san ngul uzéb na' runnu ca nac le rzè ladxí'nu nacnu ca ngul chnatnu cati' ni zoanu nabannu. ⁷Lèzca' cni, gna be'i bunách nacuá' ga ni' zu', quiè lun ca rajlóz yugu' læ ni, quiè lac bunách nutu nu gac bi gnè quegac. ⁸Chqui' zoa nu bönni' curugahuè' yugu' dí'a dza queè', len le nacr blau, chqui' curugahuè' bunách nacuá' lidxè', chgdá'baguè'è le réjlè'ru' Cristo bönni' na' len nacrè xöhui' ca nu curejlè' Dios.

⁹Huac gbabnu nup gáclenli' tuznu ngul uzéb na' chyu'urnu ca tsonnlaj iz, len chqui' cutu buca'nnu-nè' bönni' queènu quiè sóalennu-nè' yetúé' bönni'. ¹⁰Run bayúdx soa nu gun lna' lau queènu ca nacgac le dxi'a runnu. Gáclenli'-nu chqui' buscul-lnu-bi' yugu' bi'idau', len chqui' rui'nu ga la'cuá' bóchi'ru' za'què' yödz yubl ta'dxinè' lidxnu, len chqui' rui'nu le li'j lagu bunách queè' Dios, len

chqui' ráclennu nup ta'zaca' ta'guí'i, len chqui' rúntecznu yúgu'tè le nac dxi'a.

¹¹Yugu' ngul uzéb cutu yui'icnu tsonnlalj iz, cutu gabcnu nup gáclenli', le lunnu ca ta'zéz ládxi'cnu, la'dá'baga'nu Cristo, len lé'ninu lutság na'cnu leyúbl. ¹²Cni gac, la'bága'nu dul-la' le tu'zoanu tsal'l le gulayéjlè'nu Cristo zi'al. ¹³Lézca' lacnu ngul zxhuéd len ngul ta'dáz ca', len clégz lacnu zxhuéd, san lézca' lacnu ngul uné qui lzé'i len tsjítsa'cnu ga yubl, len la'nanu le cunác. ¹⁴Qui lè ni na', rē'nda' lutság na'cnu leyúbl ngul uzéb ni yu'ucnu iz cuidi', len luscúl-lnu-bi' yugu' bi'idau', len la'ná bé'ínu bi'i nacua'bi' yu'u qui queécnu, cui lui'nu latj bi gné queèru' nu rdál'baga' rē'u, rē'u na' réjlè'ru' Cristo. ¹⁵Cni ral-la' gac, le chgulubíga'nu la'cnu, ati' tunnu ca rē'ni Satanás tu' xōhui'.

¹⁶Chqui' núti'téz bönni' o ngul nu rejlé' Cristo, nacua'nu ngul uzéb lidxgac nup na', ral-la' laclen lecnu, cui lusaca' zi' bunách queè' Cristo. Cni gac, bunách queè' Cristo na' gac laclen ngul naccnu gdu uzéb.

¹⁷Benr ba la'n bönni' gul tun chi'è bunách queè' Cristo, bönni' na' ta'ná bē'è dxi'a, len bentēr ca' ba la'n bönni' gul na' tunè' dxin, tunè' lban len tu'sèdnè' bunách. ¹⁸Nayúj lu guich la'y le rna: "Cutu cu'u du rú'aba' bēdx na' rulibba' xzoa' xtil." Rna ca': "Naquè' lsaca' si'è laxzjè' bönni' huen dxin."

¹⁹Cutu si' lu na'u didza' rui' nu ruquí bönni' gul run chi'è bunách queè' Cristo, chqui' cutu nacuá' chop tsonn nup tun lna' lau qui le

benè'. ²⁰Nup tuntecz dul-la', bsidx lequè' laugac yúgu'tè bunách queè' Cristo quiè ladxi Dios yezica' bunách ni'. ²¹Ni'a queè' Xanru' Dios len ni'a queè' Xanru' Jesucristo, len ni'a quequè' gbaz la'y rō queè', rna bé'ida' li' gunu' ca ta'ná didza' ni. Tuz ca ral-la' cuequi xbeynu' yúgu'tè bunách, cugunu' ba la'n tuzè' bönni'. ²²Nutu nu bönni' gxoatè na'u, cugunu' ga gaquè' huen dxin queè' Cristo, cui gbagu'u le runè' chqui' gunè' dul-la' bönni' na'.

²³Cutur gui'ju' nisz. Le ré'itecznu' ral-la' gui'ju' láti'dau' xisi uva quiè soa dxi'a lè'u.

²⁴Yugu' dul-la' quegac la'gac bunách la'lá' lahui zi'al cati' zi'a la'dxinè' ga cuequi xbeynè' lequè' Dios, ati' tōd ni' la'lá' lahui dul-la' quegac yezica' bunách. ²⁵Lézca' cni, la'lá' lahui dxin dxi'a nungac bunách, ati' chqui' cunala'gac lahui, nutu nu gac ucachi' tsaz dxin na' nunquè'.

6 Ral-la' luntsquè' ba la'n xanquè' yúgu'tè bönni' nadá'ugac, cui gac nu gné zi' qui lè' Dios len qui xzba queè'. ²Nup ni' nacu'è xangac ta'yejlè'è Cristo, cutu ral-la' lucá'n ca'z lequè' le nacquè' bóchi'què'. Ral-la' lunrè' dxi'a xchinquè' le ta'yejlè'è Cristo bönni' ni' tu'zi'è xbey dxin dxi'a na', le nadxi'inè' lequè' Lézçè'. Ca nac lè ni, bsèdi bunách nacuá' ni', len bchiz icj nagquè'.

**Le rej ládxi'ru'-nè' Dios
le ruzi'ru' xbey**

³Chqui' zoa nu bönni' rusèdnè' xzba yubl, len cutu rusèdnè' yugu'

didza' dxi'a queë' Xanru' Jesucristo, ca nac zxba na' rusëdi rë'u ca ral-la' gunru' ca rë'nnë' Dios, ⁴bönni' ni run ba zxön cuinë' len cutu bi nöznë'. Didza' cunác dxi'a rzë ladxë'ë ca nacgac didza' baníg len didza' bizxj, le tun ga tu'zxe'i lza'gac len ta'dil-len lza'gac didza' bunách. Lëzca' tun didza' cni ga ta'né' zi' qui lza'gac bunách, len ta'zá' ládxi'gac qui lza'gac le cunác. ⁵Lëzca' cni tun ga ta'dil-ltecz didza' bunách cuta'yejni'i, nup cuta'zí' lu na'gac le nac gdutë' li. Táquinë' huac la'zi'ë dumí zian chqui' lunë' tsaxxón nup ta'yíj ládxi'gac Dios. Bcuit ga nacua' bunách cni. ⁶Zxön nac le ruzi'ru' xbey cati' len yöl-la' rböz zxön ladxí' rej ládxi'ru'-në' Dios. ⁷Cutu bi nua'ru' cati' bdxinru' yödzlyú, len lëzca' cni, cutu bi ua'ru' cati' uza'ru' yödzlyú ni. ⁸Qui lë ni na', chqui' dë queëru' le gáguru' len le gácuru', ral-la' udzjíru'. ⁹Bönni' të'nnë' gata' quequë' yöl-la' tsahui', gac quequë' le si' bë' lequë' le xöhui', ati' la'yu'ë lu yal-lj qui tu' xöhui', ati' lu yöl-la' cunözi quequë' zian le la'zé ládxi'quë', le lun ditj lequë'. Yugu' lë ni lusnít lequë' len lun ga la'nitië' tsaz. ¹⁰Le ta'zé ládxi'gac dumí bunách, run ga tun yúgu'të le cunác. La'quë' bönni', le ta'zé ládxi'quë' lei, guluca'në' le gulayejlë'ë Cristo, len chrac quequë' zian le tu'saca' zi' lequë'.

**Nu run dxin queë' Cristo
nac ca bönni' rijë' gdil-l**

¹¹Na'a, bönni' queë' Dios, bcuit ga rac le cni. Bë'tecz ladxu'u gunu' le nac tsahui' len le rë'nnë' Dios.

Gyéjlë'teczë' Cristo, len bdxí'i yugu' lza'u. Bë' ladxu'u gacu' zxön ladxí' len nöxj ladxí'. ¹²Ca runë' bönni' gdu ladxë'ë rijë' gdil-l, ben dxin qui le réjlë'ru' Cristo, len beni quiu' yöl-la' na'bán gdu. Quië gac cni bulidzë' li' Dios. Dxi'a gac le gnau' yalj lulu ca réjlë'u Cristo, lë na' gnau' laugac zian nup tun lna' lau qui didza' bë'u. ¹³⁻¹⁴Ni'a queë' Xanru' Dios, Nu na' nabánigac yúgu'të le nacua', lenca' ni'a queë' Jesucristo, Nu ben lna' lau qui le nac dxi'a le gnë' yalj lulu lahuë' Poncio Pilato, rna bé'ida' li' gun chi'u yugu' lë na' gna bé'inë' rë'u Cristo. Ral-la' gacu' gdu dxi'a len cutu bi gunu' le güi' latj nu bi gnë quiu', ga gdxintë dza ni' uluí' lahuë' Xanru' Jesucristo. ¹⁵Cati' gdxin dza na' huödë' Jesús, Dios ulu'ë lahui Lë'. Dios naquë' la'y. Tuzë' Lë' dë lu në'ë yöl-la' uná bë', len rna bé'inë' yúgu'të nup ta'ná bë', len naquë' ca' Xangac yúgu'të nup nacgac xan. ¹⁶Tuzë' Lë' zóateczë', ati' zoë' lu yení' ga cutu gac nu gdxin racz qui. Gatga nu ble'i Lë' len cutu gac nu gle'i Lë'. Queë' Lë' gactecz le run Lë' ba la'n len yöl-la' uná bë'. Ca' gac.

¹⁷Gna be'i bönni' dë quequë' yöl-la' tsahui' dza ni zoaru' na'a, cui lun ba zxön cuinquë', len cui luzxöni ládxi'quë' yöl-la' tsahui' na' cunác löz. Ral-la' lunë' löz Dios ban, Nu runntsa queëru' yúgu'të le ruzi'ru' xbey. ¹⁸Gna be'i lequë' lunë' le nac dxi'a, quië la'yantsca dxin dxi'a tunë', lë na' nac tu yöl-la' tsahui' gdu. Ral-la' bi lunödzjë' quegac bunách yechi', len lui' ládxi'quë' leygac. ¹⁹Chqui' lunë' cni, lutubë' yöl-la' tsahui' na' nac

gdu, le luzi'è xbey dza zi'a za', len
la'dél-li'në' yöl-la' na'bán gdu.

Le glu'è Pablo lu na'bi' bi'i Timoteo

²⁰Bócha'adau' Timoteo, ben
chi'i le nadód lu na'u, len bcuit ga
nacuá' nup tui' didza' ca'z len yugu'
didza' cuzaca', len yugu' didza'

bizxj, yugu' didza' na' tui' nup
ta'náz tac szxöni, ati' nazí' yé'igac
ca nac læ na' tun. ²¹La'gac bunách
gulazí' lu na'gac yugu' didza' cni,
ati' gulachixi gulanigui ca nac le
réjlë'ru' Cristo.

Rnaba' lahuë' Dios uzá' ladxë'ë
quiu' le nacgac dxi'a queë'. Ca' gac.